

Diskaun hingga 25 peratus bil elektrik Julai hingga Disember di Sarawak

Mohd Roji Kawi

mdroji@bh.com.my

Kuching: Kerajaan Sarawak meneruskan pemberian diskauan antara 10 sehingga 25 peratus untuk bil elektrik pengguna domestik, peniaga kecil komersil dan peniaga kecil industri bagi tempoh enam bulan tahun ini, bermula 1 Julai hingga 31 Disember.

Menteri Utiliti dan Telekomunikasi Sarawak, Datuk Julaihi Narawi berkata, sebanyak RM203.7juta diperuntukkan di bawah skim Bantuan Khas Sarawaku Sayang (BKSS).

Menurutnya, daripada jumlah itu, sebanyak RM123 juta diperuntukkan sebagai subsidi untuk diskauan pengguna domestik manakala RM80.7 juta untuk peniaga kecil industri.

"Diskauan bagi bil elektrik menerusi skim BKSS sebelum ini berakhir pada 30 Jun lalu namun kerajaan Sarawak meneruskan lagi diskauan itu untuk tempoh 1 Julai sehingga 31 Disember 2023.

"Menerusi skim BKSS itu, pengguna domestik menikmati diskauan 25 peratus, 15 peratus bagi peniaga kecil komersil dan 10 peratus bagi peniaga kecil industri," katanya pada sidang media di Menara LCDA, The Isthmus, di sini, hari ini.

Menurutnya, menerusi bantuan khas diskauan bil elektrik itu, seramai 700,000 pengguna akan menerima manfaatnya.

Mengulas lanjut mengenai kekeliruan apabila ada pengguna mengadu bil elektrik tinggi selepas Jun lalu, Julaihi berkata, bagi pengguna domestik diskauan untuk bulan Julai hingga Oktober 2023 akan dimasukkan ke dalam bil bagi bulan Disember 2023.

"Bagi penggunaan elektrik untuk bulan November dan Disember pula, kadar diskauan akan dimasukkan di dalam bil bulan November, Disember 2023 dan Januari 2024.

"Pasukan petugas khas Sarawak Energy Berhad akan membuat pelarasan dan pengiraan bil sewajarnya agar pelanggan dapat menerima diskauan mereka bermula pada bulan Julai tahun ini," katanya.

Menurutnya, bagi peniaga kecil seperti pengusaha bengkel, kopitiam, rumah kedai, restoran dan gerai penjaja, mereka boleh memohon diskauan bil bulanan dengan mengemukakan permohonan kepada Sarawak Energy Berhad sehingga Disember ini.

"Kelayakan diskauan adalah bergantung kepada penggunaan elektrik tidak melebihi 30,000 kilowatt jam (kWj) untuk tempoh 1 Julai hingga 32 Disember 2023.

"Tawaran itu terhad kepada pengguna bagi kategori C1 iaitu perniagaan komersil biasa dan I1 untuk industri biasa yang bermakna penggunaan elektrik mereka secara purata adalah 5,000kWj sebulan dengan had 30,000kWj dalam masa enam bulan," katanya.

Julaihi berkata, sejak BKSS diperkenalkan mulai 1 April 2020 hingga 30 Jun 2023, kerajaan Sarawak membelanjakan sebanyak RM1.15 bilion untuk inisiatif diskauan bil elektrik.

"Diskauan bil elektrik menerusi BKSS ini akan berakhir pada 31 Disember tahun ini berikutan Perintah Kawalan Pergerakan (PKP) sudah berakhir dan wabak Covid-19 kini berada dalam fasa endemik di seluruh dunia dan pemuliharaan di Malaysia," katanya.

Menurutnya lagi, bagi pelanggan yang menerima bil elektrik berdasarkan anggaran adalah digalakkan untuk menghubungi Sarawak Energy Berhad untuk pelarasan bil supaya dapat menikmati nilai diskauan yang sepatutnya.

Disiarkan pada: Oktober 9, 2023 @ 5:53pm